



K a n o a n a

<i>Te Kamauri</i>	1
<i>Kaongora man NSC</i>	2
<i>Kaongora mai irou-</i>	2
<i>Taeka n reirei</i>	7
<i>Ana Tangira Te Uea</i>	8
<i>Te Maiu ae tabu</i>	10
<i>Te Marian page</i>	12

Te Kamauri



Kam na bane ni mauri—**Merry Christmas** ao **Happy New Year** n ana Tangira te Uea!

E a roko ara tia kamaiu alleluia, e bon bukiaki ibukira ni kabane, e a bungiki ara tia kamaiu nte bongin te Kiritimati, alleluia. Ai bon banan **Emmanuera** nakoimi ni kabane tarira ao manera inanon te Kiritimati aio. E taku tamara te Bobe inanon ana tai ni maroro nte **Vatican** nte Kanimabong 25th December, ba ena bon riai n uki nanora ni butimaea ana karatia te Atua ni bungikiakin natina ae Iesu ba kaotan ana nanoanga nakon aonnaba. Bon te ota ae ruo mai karawa ba e na katoka te roo ma iriana are ena katoka te maeku ao te raraoma. Bon te bong n te tokanikai ba e uota te raoi, te ikabarabure, te kimarerei ma te kukurei irouia aomata ni kabane, moarara riki irouia aika iai rawawataia ma kainanoia.

E bon taku te Bobe, ba ngkana a uki raoi nanora ao tina katotongia taan kawakin tiibu are a nora raoi Iesu ae bungiki ibukoia maan ao a bon kakoaua raoi te kanikina are kimarerein ana karatia te Atua iroun Iesu te tei.

Ai bon kabaiara ngaira n noran kamimin ana tangira Te Atua aio nakoira. Ai rabara te Atua n ana Tangira ae akea tiana ibukira. Ti bon kakabaiaki naba n rinanon tinara ae nei Maria ba ngaia are e moan anganaki te kanikina aio. Tinara naba te Ekaretia e bon teimatoa n anganganira te kanikira aio ni katoa ririki ba kauringaan bungikiakin natin te Atua ae moan te rietaata. E na bon teimatoa n tei

aio ba te kanikinan te raoi ao te kabaia inanon te Ekaretia, inanon ara Bariti (Parish) ao inanon ara makoro ma ara utu ni Kiritian ni kabane.

E bon kamatoa riki Tamara Te Bobe n ana taeka ae kangai, **“Where God is born, hope is born. He brings hope. Where God is born, peace is born. And where peace is born there is no longer room for hatred and for war”**. Are nanona ba nte tabo are e bungikiaki iai te Atua, ena bon bungikiaki iai reken te tokanikai, ena bungikiaki iai te raoi ma te kabaia ao kakean ke katokan te kairiribai ma bubuaka. A bon bia bungikiaki moa inanora n tatabemanira Iesu ae Te Atua. Ba ngkana e bungikiaki raoi ni koaua inanora ao e na bon toki naano aika buakaka ma te kairiribai inanon ara utu, ara makoro, ara bariti ao iaon abara ke n taabo ake ti mena iai.

E rangin kukurei Emmanuera n te tai aio n reita te Ekaretia i aonaba ao riki bon iaon abara ae Kiribati n celebrate ke ni bukamarua te bong ae kakawaki aio iroua ngaira te nati ni Katorika ao ai bon ngaira kaain te Charismatic iaon Kiribati ke n taabo nako.

E na teimatoa Emmanuera ni kamroroira ni katoa teniua namakaina (quarterly basis) ma rongorongon ana waaki te Kiribati Catholic Charismatic Renewal Service (KCCRS) ke ana botaki te Charismatic iaon Kiribati ae banin. Ena teimatoa ana tiim Emmanuera ma kaain te NSC ao n raonaki iroun Fr Koru ao tiim riki ake a teimatoa ni karanganakoa ana tangira Te Uea iaon ara website (www.kccrs.gov.ki) ao iaon ana facebook page are e tiba tia naba inanon te namakaina aio, ao n arana ae ena reke iai **“KCCRS (Kiribati Charismatic)”** iaon te internet. E bia teimatoa ana kairiri ma ana kamarurung Te Tamnei ae Raoiroi nakoira ni kabane ba ena roko ueana ma ana tangira taabo ni kabane ao i aonnaba ni kabuta.

Bon ana tataro Emmanuera E na kabaroa iaomi ana karaoiroi te Atua inanon am tai wareware ao mani karekei tibangami aika a tamaroa ibukin irirakin ao maeuakinan Nanon te Atua n taai nako. **Ana kakabaia Iesu te tei nakoira ni kabane inanon 2017.**

*“Where God is born,
hope is born. He brings
hope. Where God is
born, peace is born.
And where peace is born
there is no longer room
for hatred and for
war.....”*

Kiribati Catholic
Charismatic Renewal
Service

Ibukin am rongorongo, taiaaaka reitaki ma
Uriam Timiti, Beneteta Raobati ao Kautoa
Tonganibeia.

Phone: + 686 73029388 NSC Office,
Teaoraereke

E-mail: timiti_u@usp.ac.fj;
bene_raobati@yahoo.com.au
kautoaj3tki@gmail.com



*“Ti karaba aia
kekeiaki taan tabekina
baain ni katangtang
ibukin kabobongan ana
bai nebonebo te botaki
ae banin iaon Tarawa.
”*

Kaongora man NSC

Teretia Ioane. NSC. Office. Teoraereke.

Iai ngkai ana project te NSC are e na kataia ni karaoia man iangoa kabobongana n aia tabo Taama are Maoton te Manga nakon te ririki ae boou.

Ana project aio bon katean taian auti ni matu, te Maneaba, te kainakotari ao ai bon te chapel ao te koronii are e na karaoia nakon 6 Jan 2017.

Iai te mananga are e na karaoaki nakon te weekend aio ae n 6 Jan 2017 irouia baeriti ae teniua are a na tiku iaon te tabo ae Maoton te Manga inanon teuana te wiki ni katiia raoi aron te kaitiaki ao taraan raoi te tabo ba a na kateaki raoi iaa taian kateitei aikai.

E iangoia Fr Koru ba e na kateaki taian toilets moa n tanrion te tabo aio n uakan ma taari ni kaitaraa te tabo are e wawarake te koraki iai. Te chapel e na kateaki i tanrake ao te Maneaba e na taraaki raoi nnena ae e na nakoraio ao ai aron naba taian kiakia ake a na kateaki.

E kantaningaia NSC ba e na tia raoi ana karikirake aikai inanon te moan ao te kauoua ni kuata n te ririki ae e boou 2017.

Iai naba ana Get Together te NSC ae e tabe naba ni iangoia ibukia kain te Karetimatiki iaon Tarawa Teinainano ma

Betio are e na karaoaki naba inanon te first quarter n te ririki ae e boou. Aio are e bon iangoia ibukin ana Fund Raising ao te inono imarenaia ni kabane ba aongan ae e raoiroi te itoman imarenaia man kinaiia raoi ao e na riki naba ba karikirakean te itangitangiri imarenaia man nano teuana ibukin karikirakean ana waaki ni kabane te Uea inanon te botaki aei.

Ti karaba aia kekeiaki taan tabekina baain ni katangtang ibukin kabobongan ana bai nebonebo te botaki ae banin iaon Tarawa. Iai ngkai ara key board (aokan) ae boou, e tiba reke naba inanon te wiiki ae nako. E bon tuai koro boona ngkai inanon bain NSC, ao e kakaai ngkai ana waaki NSC ma ana roronrikirake ba ana kawaetatan kakoroan boon te kabane iaon baai ni katangtang aikai.

Ke E raonira man kakabaiaia ara waaki ni kabane Te Uea ae Atuan aonnaba.

Kaongora mai iroumi

**Te Riboti man St. Columban
Nenenteiti Teariki Ruatu , Tiibi Rita. Bikenibeu Parish**

Kam na bane n mauri Tarira ao Mwanera n kabane n ANA TANGIRA TE UEA!

Ana Rai-Nanoanga St. Columban CRS nakon aia Chaplain ae Katekiti Tekaai Annaua

Ti karabwa ao ti neboa te Uea ae e taua mwin maiura n taainako ibukin maiun ao ana beku ara Chaplain ae Katekiti Tekaai Annaua, n ara botaki n Charismatic ae St. Columban n ara Parish ae Bikenibeu, are e a tia n anganira ao n tibwaia nakoira n ana tai n mwakuri irarikira n karokoa te tai are e toki iai ana borau iaon te aba aio n 23rd bongin te namwakaina ae Tebetembwa, 2016. E rineaki Katekiti Tekaai iroun ara Tama n ara Parish ae te Tama Ipasio, bwa e na riki bwa te Chaplain ibukin ara botaki n tataro ae te Charismatic are e kinaki naba n arana ae St. Columban CRS. E taua nakoana aio inanon te maan ae teuana tabun te ririki (2015 – 2016), irarikin tabena ao tibwangana are te Katekiti ngaia ibukin te mwakoro ae Te Bonnano, n aonon Bikenibeu Mainiku.

E kaiaki rabwatan te Chaplain/ Katekiti Tekaai n te bong are imwina ae 24th Tebetembwa 2016 ao te tutia n mate e kairaki irouia Te Tama Ipasio ao Te Tama Martin.



Rabwatana e wene ma te rau irarikin mwaneaban ana mwakoro ae Bonnano, iaan aia bubuti unimwanen ao kaain ana mwakoro nakon te Tama Ipasio. Iaon ruanimatena ao e a tia n kateaki te kaibangaki ae e bubura are e unikaki iai are e kona n noraki irouia aomata ni kabane ake a roko iaan te mwaneaba aio, te tabo are e kona n noraki iai ruanimaten te Chaplain/Katekiti aio. E na tei te Kaibangaki iaon ruanimaten Chaplain/Katekiti Tekaai bwa e na reitinako ana mwakuri n mitinare imwina, e ngae ngkana e a tia n kitana te maiu aio. Anne te kantaninga ae e anganaki buna ma natina ake a tiku imwina iroun te Tama n te Parish ae te Tama Ipasio.

E rangin kakateke anuan maiuna n kabane are e a tia n anga bwa te banna n kato-to, riki iaon anuan maiun te Kiritian n koaua are e teimatoa n kakaotia inanon maiuna n te bong teuana ma teuana. Ngke e moan roko ibuakoia kaain te Taibora n te bwanin inanon ara botaki n Charismatic, n ana moan tetere n bowi te Taibora, imwin Toan te Bentekota inanon te namwakaina ae Meei, te ririki aio, ao e tibwaia te Katekiti aio ae e boou n te waaki n tataro ao ana waaki n kabane te botaki n Charismatic. Ma e ngae n anne ao ngkai e a tia n bukinaki iroun te Tama bwa e na riki bwa te Chaplain ngaia, ao e na kabanea ana kabanea n tamaroa n karaoa tibwangana ibukin te botaki n Charismatic. E rabwa te Uea ibukin ana taeka aio bwa e kakoroa nanona ngke e a karaoa ana course iaon *Te Maiu ae Onraken te Maiu* ibukin kainaomatan te Tamnei ae e Raoiroi irouna. Ti neboa riki te Uea bwa e a tia naba n tokanikai Chaplain/Katekiti Tekaai ngke e a kainaomatiki te Tamnei ae e Raoiroi irouna, inanon te kateniua n kuata (3rd quarter (Turai – Tebetembwa)) n tain te tutia n reitaki n Charismatic are e karaoaki i Teoraereke, are e kairaki karaoana iroun te Tama Koru.

Bon te bong ae e rangin kananokawaki ao e kakuba, e aki kantaningaki riki irouia buna ma natina ake a tiku imwina, ana utu ao raoraona n kabane n ikotaki ma kaain St. Columban CRS boong aikai ao te namwakaina ae Tebetembwa. Ara tataro ae e teimatoa ibukina ao riki ibukin buna ma natina ake a tiku imwina ao akea ara nanououa bwa te Atua ae e mwaaka ae e na bon teimatoa n kawakinia ao n kairiria inanon maiua ao riki aia waaki ake a na teimatoa n reitia n karaoia ibukin te Uea. Ti bane n neboa te Uea ibukin ana babaire aika a raba mai irouna n tatabemanira nako, bwa bon ti ngaia ae e tau-taekani maiura n taainako ao ana babaire ae tina teimatoa n ongongotaeka nako iai. Ti

karabwa riki te Uea ibukin maiun ara Chaplain/Katekiti Tekaai ao riki ana beku ao ana botumwaaka n ibuobuoki nakoira n ara botaki n Charismatic are e a tia n anganira inanon maiuna. E ngae ngke e a tia n bua man te maiu aio Chaplain/Katekiti Tekaai, ma ti teimatoa n ongo bwanana are e nanako n ana rerio n kaongora te aro n Katorika ae St. Paul Studio, bwa ngaia temanna are e kairira karaoan te Korona are e aki toki n kakanakoaki bwa kanoan ana kaongora St. Paul Studio n katoa bong. E na neboaki te Uea n aki toki ao ko rabwa te Uea!

Karaoan Ana Toa St. Columban – 23rd November 2016

E rabwa te Uea ibukin teimatoan te maiu, te korakora ao riki ana kakawakin nakoira n tatabemanira nako inanon ara Parish aika a kakaokoro. Ti neboa te Atua ae e maiu n taainako inanon te Eukari ibukin te korakora are e a tia n anganira ibukin ara waaki n kabane mai moan te kuata aio n karokoa te tai aio. E mwaiti kanoan waan St. Columban CRS inanon te kuata aio, ao ti teimatoa n karabwa te Uea n te korakora ao te kekeiaki are e a tia n angania kaain ara Parish n karokoa te tai aio.

Te namwakaina ae Nobemba ao ti kaitaua te Uea ibukin rokon ao kawaran ara botaki n Charismatic iroun Te Tama William Lee, te tia tei ibukin te Utu n Tama ae St. Columban mai Suva, Fiji, te tabo are e tei iai rabwatan ao aobitin te Utu n Tama aio. Rokon te Tama aio, e taorimwia te bana n kakao nakon te Utu n Tama aio irouia kaain ara botaki, rinanon aia Tama Frank Hoare, ibukin karaoan ana toa ST. COLUMBAN are e bwakara 23rd November 2016 irouia kaain ara botaki n ara Parish ae Bikenibeu. E moan kawaraki ara botaki n Charismatic irouia kaain te Utu n Tama aio iroun te Tama Hoare, n rokona i Kiribati inanon te namwakaina ae Turai ibukin karaoan ana mwakuri n kakaeaia ataeinimwane mai Kiribati ake iai nanoia ao aia konabwai n kata te nakoa ae e tabu rinanon aia Utu n Tama are e kinaki n arana ae St. Columban. Kawaran ara botaki n Charismatic iroun Fr. Lee e kamatoa te mwaneka ae e kakawaki ibukin te reitaki ae e kakawaki irouia kaain te Utu n Tama aio ao ara botaki inanon ara Parish ae Bikenibeu rinanon te ingoa are ti kabongana ibukin aran ara botaki ae St. Columban. St. Columban bon te ara are a tia n anganaki (rinanon te rinerine n Tamnei) kaain te Taibora n nuka (Tiibi Rita, Kauoman n Tiibi Rita, kaain te NSC mai Bikenibeu Parish, ao ara chaplain n ara botaki n Charismatic ae



”Rokon te Tama aio, e taorimwia te bana n kakao nakon te Utu n Tama aio irouia kaain ara botaki, rinanon aia Tama Frank Hoare, ibukin karaoan ana toa ST. COLUMBAN”



“Ai bon bwanan St. Columban CRS n katekeraoi nakon te Tama Lee n okiran Suva, Fiji irouna, n reitaki”

Katekiti Tekaa (ke e motirawa ma te rau n ana atataiaomata Atuara ae moan te mwaaka) n rinea n tain te Bentekota inanon May te ririki aio.

E koro aron ana katauraoi St. Columban CRS ibukin butimwaeana ana toa ST. Columban are e moanaki ma kananoan riki aia atatai iaon rongorongon Santo Columban, te reirei iaon aron ana mwakuri n Mitinare te Santo aio, aron moan katean te Utu n Tama ae Santo Columban, rongorongon moan kabutan ana mwakuri n Mitinare te Utu n Tama aio, te rereua ao ai karaoran ana toa ST. Columban are e butimwaeaki ma te tutia n te umwantabu I Nandesi ao n taorimwiaki n te baka n amwarake i Santa Maria mwaneaba. E rabwa te Uea ibukin taian tibwanga n kabane ake a tia n reke irouia kaain ara botaki rinanon rongorongon ao bannan anuan maiun te Santo aio, riki aron maiuna n Mitinare ao ana bekumwaaka ibukin buokaia kainnana rinanon ana kairiri te Tamnei ae e Raoiroi. **‘We Belong to Christ But Not to Ourselves’ – ‘Ti Bwainaki iroun te Uema Tiaki Iroua’.** Aio ana Boto n Iango te Santo aio, are e riki naba bwa aia boto n iango kaain te Utu n Tama aio ao bon te Boto naba n Iango are e kaira aron te tutia n bukamaru ibukin butimwaeana te toa aio. E kairaki te tutia iroun te Tama Lee ao kaain te Botaki n kabane ake a reke rokoia n ira te tai aio, ake a karaoa aia katamaroa inanon te umwantabu ao te mwaneaba, a kaira karaoran te tutia n aron anenen te tutia, te wareboki, te taramo, te ua boki, te ua karea ao ai te katituaraoi.

Irua aika a rine n tain te Toa aio bon Te Tama n ara Parish ae Te Tama Ipasio ao te Mataniwi n Katekiti (a karautaeaka bwa a aki reke rokoia n tain te botaki n te mwaneaba), buun Te mataniwi n Katekiti, te Tia Babaire n te Parish ae Titaake Tonganibei, Katekiti n Kabane ao buuia n ara Parish, Te Tama Lee, Betero Atanibora are te Coordinator n te Lay Columban Group iaon Kiribati, te Tia Babaire n te NSC ae e bwanin ao ai Tiibi Rita ao kauoman n Tiibi Rita man Parish aika Teaoraereke ao Betio. Te amwarake e taona mwaina n te tain anne are e buokaki naba irouia mwakoro n kabane inanon Bikenibeu Parish, irarikin are e a tia n baireia Te Tiibi Rita nakoia kaain te Botaki n kabane man mwakoro aika a kakaokoro. E kairaki te botaki aio iroun temanna kaain te Botaki (MC Kinin – kaain te botaki man te mwakoro ae Santo Bita Kanere) ao e moanaki te bukamaru ma te Tataro n kaukuki iroun Te Tama Lee, te katokabau irouia mataburon te botaki, te amwarake, te maroro iroun te Tama ao irouia iruwa are e

karemarenaiki n taian kanoa mai irouia mwakoro ake a reke rokoia n reitaki ma te kanako titati are bon katakakaraoia naba iruwa aika a rine n te tai anne.

E reke naba aia tai kaain te botaki n bakaboraua Te Tama Lee inanon mwaneaban te Parish ae Santa Maria n te Katenibong ae 30th November 2016 imwain kibana n okira Suva, Fiji n 1st December 2016. Iruwa aika a rine n te tai aio bon Te Tama Lee ao n raonaki iroun Betero Atanibora ao temanna te teinimwane are e a reke imwin te maroro ao te ukeuke ae e kimototo are e karaoia ma te Tama Lee, are e a tauraoi naba n karaoa ana moan tetere n kataneia ibukin kainakin te Utu n Tama aio ae Uakeia Nawaia (man te mwakoro ae Rurete). Ai bon bwanan St. Columban CRS n katekeraoi nakon te Tama Lee n okiran Suva, Fiji irouna, n reitaki ma te Utu n Tama ae St. Columban iaon Fiji ao ti reitia naba ma te bwana n katekeraoi nakon Uakeia ibukin ana kekeiaki are e a waaki inanon n te tai aio ibukin ana katauraoi are e tabe ngkai n rinanon. Ti na teimatoa n tataro n taainako ibukimi n kabane bwa kam na bane n anganaki te korakora ao te teimatoa n ami kakaonimaki ibukin uakinan te nakoia ae e tabu ao karaoran nakoami ae e Tabu ngkami Taam n kabane inanon ami Utu n Tama ae St. Columban.

Katekeraoan ana kawaniua n ririki n taua nakoana n Berebitero te Tama Ipasio

Te bong ae 13th bongin te namwakaina ae Ritembwa, ao e karaoiki te baka n amwarake ae e uarereke irouia kaain te Parish ae Bikenibeu, n mwengan te Tama Ipasio i tanrion te umwantabu are i Nandesi. E biriaki kaka nimaua taian boora n amwarake man mwakoro nako inanon te Parish ae Bikenibeu, mai Nabaina nako Taborio. Teitoiningaina, ngaia are e taua kairan te botaki (MC) n te tairiki anne. A babane Katekiti ma buia n raonaki iroun te rikan (Rikan Robwati are e a riki ngkai bwa te Tama imwin katabuana nakon te nakoia n Berebitero n te bong ae 17th bongin te namwakaina ae Ritembwa) n raonaki irouia tabeman Taama ao taari man Mitinaren Atinibaan Iesu (MSC), ake a reke naba rokoia n kakooua ana bong te Tama Ipasio ae e kakawaki aio. Inanon waakin te botaki ao e reke naba ana tai n anga ana maroro Te Tama Ipasio, n anga bwanana n karabwarabwa ao n kakaitau nakon te mataniwi n Katekiti ao Katekiti n kabane, raona n Tama ake a reke rokoia n te tairiki anne, taari ao ai bon nakoia kaain te Parish n kabane ake a reke naba rokoia. E karabwarabwa riki te Tama ibukin te ibuobuoki ao te bou-

toka are e teimatoa n anganaki ao n karekea mai irouia kaain te Parish n kabane ao riki ibukin te ongotaeka iaan ana kariri ngkai e riki bwa te tia tararua te Parish ae e bubura n aron Bikenibeu. 'I tuai tai bwa ai tibwa 8 au ririki inanon tibwangau ae Te Tama inanon ara Parish ae Bikenibeu ao I bubuti kabwaran au bure ma au kairua n kabane ngkana iai ae I a tia n tibanako iai' tabeua manewen ana maroro te Tama Ipasio are e anga inanon ana maroro n ana bong ae e kakawaki aio. E butimwaeaki ana maroro te Tama aio irouia kaain te Parish ma te maroro n kakatekeraoi ao n kakabwaia n reitaki ma te bubuti nakon te Uea ae e mwaaka bwa e na kateimatoa te Tama Ipasio ibukin tibwangana n Berebitero inanon te kakaonimaki. Kona tekeraoi riki te Tama Ipasio n am kawaniua n ririki n taua nakoam ae te Berebitero inanon am Parish ae Bikenibeu. Iriam n taainako ana bau ara Ekaretia Katorika are te Atua te Tama, Te Atua te Nati, ao te Atua te Tamnei ae e Raoiroi.

N te bong are imwina ae 14th bongin te namwakaina ae Ritembwa, ao e a manga teirake ana Taibora St. Columban CRS n uoti ao n nikiri naba ana bwaintangira te botaki n Charismatic ae e bwanin inanon Bikenibeu Parish, iroun te Tama Ipasio. E karaoaki aio iroun te Taibora bwa kakoroan naba nanon te babaire are e a tia n baireaki ao n kamatoaki irouia kaain te Taibora ao Riita n kabane man mwakoro ake a roko n te moan tetere n bowi ibukin te Parish ae e bwanin, are e karaoaki n 7th bongin te namwakaina ae Ritembwa. Te waaki aio are bon kauataoan te kakatekeraoi ao te karabwarabwa nakon te Atua ibukin ana kaka-wakin ao riki te korakora ao te tokanikai are e a tia n angan ara Tama aio, n karokoa inanon waniua raoi te ririki n taua nakoana bwa te Berebitero ngaia, ma ngke e moan katabuaki n karokoa te tai aio. Te bong aio are e bon kauringa naba iai te bong ae e kakawaki iroun te Tama Ipasio bwa ana bong are e moan karaoa naba iai ana moan tutia, imwin katabuana. Bwain tangira ake a uotaki irouia kaain te Taibora ao te NSC mai Bikenibeu bon teuana te keke are e mwakoro iai 'HAPPY 8TH ORDINATION ANNIVERSARY TO YOU FR. IPASIO'. Ko na tekeraoi te Tama Ipasio n am bong ae e kakawaki aio ao raom te Uea n taainako n am beku.

Kaeen Marakei ibukin bukamaruan ANA TIENTURE MARAKEI (10th December 2016) irouia kaain ana Taibora St. Columban CRS

N te maroro irouia kaain te Taibora ibukin te Parish ae e bwanin, are e karaoia ma riita n kabane ake a reke rokoia n te bowi are e karaoaki n 7th bongin te namwakaina ae Ritembwa, ao e baireaki ao n kamatoaki bwa a na mwananga kaain te Taibora n ira ana tiim te Tama Ipasio, are e na mwananga n karangainan te kaonobong ae 10th bongin Ritembwa 2016 mai tabon te uabu i Betio. Te bao n mwananga bon Te Keketi, are bon ana pilot boat te KPA are e charter mwananga nako Marakei n kaitara kainnanaoan te bao n mwamwananga nako Marakei ibukin te Tienture. Ake a reke mwanangaia bwa a tei naba ibukin St. Columban CRS ae e bwanin bon te Tiibi Rita, te kauoman Tiibi Rita ao te Tia Koroboki. A raonaki iroun temanna kaain te NCS mai Bikenibeu Parish. E karautaeka te tia mwane n te bwanin n te tai aio bwa iai tabena ae e karina are e aki kona n reke angana n kitanna.

A rikoaki kaain ana tiim St. Columban n karangainan te kaonobong anne, tao te aoa 3.00 a.m. ao e a kaeaki nangin tabon te uabu are i Betio. Kaain te mwananga n te tai aio, bon te Tama Ipasio ma ana katekiti tabeman n raonaki irouia tabeman ana tia mwakuri te Tama n aobitin te Parish. E kitana tabon te uabu Te Keketi n te aoa 5.00 a.m. ao e kaea nangin Marakei. E roko i Marakei Te Keketi tabeua te miniti imwin iteran waniua (8.30 a.m.) n te ingabong naba anne. Bon akea te kabane tai irouia kaain te tiim bwa are ai te waerake naba n bakarerea te tabo are a tia n mwaneaki iai kaain te Parish ae Bikenibeu, ike a ibwabu naba te katauraoi imwain te tutia. E koro aron te katauraoi iroun Marakei bwa kanoan ana butimwaei nakoia kaain ana tiim te Tama Ipasio ake ti kaai n roko ma ngaia. Te amwarake e ana arona, riki te baere te bwabwai are e bane kangangina, n kukanakina are te kaburoburo ao te bekei ao ai tannana are te beeki ao a mwaiti riki. E kaeaki ana tai Marakei are e a tia n anga bwa te tutia ibukin kauringan te Tienture bwa iteran tebwina n te ingabong anne (10.30 a.m.) Ngaia are e aki naba reke te tai n arori nuka irouia taan mwananga mai Tarawa ake a uti n roko n te ingabong naba anne. Kaain ana tiim St. Columban CRS man te Parish ae Bikenibeu, a ira naba te katauraoi ma oneaia ana kaborai te Botaki n Charismatic ae e bwanin are te mainaina ieta ao te uraura inano. A uarurung aomata n roko n te mwaneaba are e a tia n katauraokai bwa te tabo n tutia ibukin kauringan te Tienture. Ma n tokin te tai, ao e aki waaki te tutia n karokoa imwin tawanou teutana bwa a taningaki iruwa



*"I tuai tai bwa ai tibwa
8 au ririki inanon
tibwangau ae Te Tama
inanon ara Parish ae
Bikenibeu ao I bubuti
kabwaran au bure ma
au kairua....."*



aika a rine ake ngaia naba kaain te tutia n Tienture bwa a karaoa aia katabwanin iaon te abamwakoro ae Marakei.

Imwin te tutia ao e a manga waaki kanoan te mwaneaba ma e aki bwara kanoan te mwaneaba irouia kaain te tiim man St. Columban CRS bwa a manga katauraoi naba ibukin tokaran baويا n okira Tarawa n baويا are Te Keketi. E kitana Te Keketi tabeua te miniti imwin 6.00 p.m. n te tanimaeon taai anne ma kaaina ake a bon iria naba n roko iaon Marakei n te karangaina anne mai Betio, n raonaki irouia tabeman Taama, tiina ao kaain te Tienture ake a kareke bao naba ibukin okiran Tarawa irouia. E rororake Te Keketi i tabon te uabu i Betio tabeua te miniti imwin 10.00 p.m. n te tairiki naba anne. E rabwa Te Uea ibukin am kakawakin. ao riki te korakora are koa tia n angania kaain te Tiim n kabane n raonaki ma Te Tama Ipasio ma kaain ana tiim-taan mwakuri n Te Keketi ao bon aomata n kabane ake a tia n borau n akea te kanganga imarenan Tarawa ma Marakei ibukin reitan te bukamaru iaon Marakei n karaon te Tienture.

Riiboti Mai Teoraereke

Taeam Ienimoa, Tiibi Riita. Teoraereke Parish

Mauri tariu ma maneu n ana tangira te Uea inanon te Xmas ao New Year.

Aikai rongorongon ara botaki n tata-ro mai Teoraereke Parish ni moan te ririki aio ni karokoa banen te ririki.

Ti kukurei ni kaotia bwa man tibwanga inanon te ririki aio ae kangai, “Kabutanakoan ain ana tangira te Uea nakoia tarira ao manera” ao aikai ara mwakuri ake tia tia ni karaoi ni kaineti ma te tibwanga anne. Kawa aika a tia ni kawaraki inanon te ririki te ririki aio bon mwakoron Banraeaba ae Santo Kabiriera ao mwakoron Teoraereke ae lerutarem. A tia ni kawaraki 3 kurubun lerutarem ao nikirana ake 3 anamanga kawaraki imwin te Xmas. A tia naba n roko aia bubuti makoron Teoraereke Parish ake tabeua bwa ana kawaraki ao ti kukurei naba ni kawaria.

Ni karaon Santo Kabiriera ao lerutarem ao ti kaei kawa aikai ni katoa week-end are tiaki wikin te bwakabwai man tairikin te Kanimabong ao ni kawari mwenga ni kaonobinga n nebonebo ma ngaia. E irianaki te nebonebo ma te katokabai ao kaitiakan te mwenga. Ni bwakantain naba te bong anne ao tia okiri naba mwengara. Ni kawarakin mwenga ao ti korubunira n te maiti ae itiu ni waerake. E rabwa te Uea bwa a bane ni buta taian mwenga. Ti nora te

kamauaki irouia aorakin te mwenga, te rairannano ao n reitaki ma kamarurugan aia onimaki.

Ti kukurei naba ni kaotia bwa n ara kawa are akea iai taiboran ara karitimatiki ae Nanikai imain teira ao ngkai e a reke taiborana. Ni mwakoron Teoraereke Parish ake nikirana ao a bane n tei taiboraia ao ni marurung naba.

Iai naba roronrikiraken te karitimatiki ae maiu reirei ngkai i Teoraereke ao n tararuaki iroun te unnaine ae Nei Tetiu. iai ngkai te mwakuri ibukia roron-rikirake ni kiran kawa.

Ibukin te tiim ni katoki aoraki ao akea tiimin te bwanin ao a bon toa kawa ngkai ma aia tiim ni katoki aoraki.

Ti karabwa tinara Nei Maria n ana tangira bwa boni ngaia are raonira n ara waki ngkai ti teimatoa ni katiki mangaia inanon te kawai ni kawari kawa ake tina waki iai. Bon ara karabwaraba naba nakon Fr.Maukai, Fr.Yield ao Fr.Teatao ni kairan ara Tutia ni kakorakora. Ai moara riki ara kakaitau ma ara karabwarabwa nakon Fr.Koru n ana kairiri ae kororaoi n reitaki ma ana tangira nakoira ni kabane. Ti karabwa katekiti lotebwa ma Veronika n aia boutoka naba.

Ai bon ara karabwarabwa nakon Santo Kabiriera ma lerutarem ma aia katekiti ma buia n tauraoin nanoia ni butimaea ana tangira te Uea ao n reitaki naba ma tabeakinara ma aia bain tangira nakoira ni menara irarikia ao bon ngaira kain te karitimatiki ake ti roko ni karaoa te mwakuri. Kam bati n rabwa ao are ieta ngkami n ana tangira te Uea.

Ai bon bwanan ami taibora ni kamauri ao ni katekeraoi ngkami ni kabane inanon te Xmas ao te New Year aio nakoimi tarira ao manera iaon Tarawa, aban Kiribati ni kabane, i New Zealand ao i Fiji. Ai moara riki ai bon ara kamauri ma ara tatara ni katekeraoiko nakoim ngkoe Fr.Koru Tito inanon am beku n tainako.

Iriara n tainako motin ana reta St.Paul nakoia i Biribi are kangai, “Mauira aio tii ibukin Kristo ao matera bon kabwaiakira riki”.

Riiboti mai Betio Parish

Teburoburo Eita, Tiibi Riita St Faustina

Ara kamauri nakoimi ni kabane tarira ao manera n te kiritimati aio, Kam na bane ni mauri n ana tangira te Uea.

Ti karabaraba ba ti a roko n tokin te ririki 2016 ma te marurung ao te kekeiaki

“Mauira aio tii ibukin
Kristo ao matera bon
kawkabwaiakira riki”
...”

ae teimatoa ibuakon te mamara ma te kataki ae bati. E teimatoa te nebonebo ni katoa Katenibong inanon makoro ao ni katoa Tabati n taian tabwena aika uoua ba Tako-ronga ao Temakin. E teimatoa naba te buti ni katoa namakaina nakon makoro ni kabutan ana tangira te Uea ao ni bon taai naba are e kainnanaoaki iai.

N 9 - 11 Ritemba ao ti karaoa ara moan kainaomata ibon iroura n te ririki aio. Ti karaoa ara rereua n Santo Bauro ibukin katauraoaia tarira ma manera ake a na kainaomataki aika 10 maitia ni kabane ba itiman ikawai ao teniman ataei ao temanna mai buakoia bon kain Banaba are e bubuti ba e kan kainaomata ikai. Imuin ongoraeen ana rongorongoa ao ti a kaoa nakon ara rereua n te tai anne ba e na katauraoaia naba ibukin kainaomatan te Tamnei ae Raoiroi. Iai naba temanna te rita mai Maiana are e reke naba rokona ao n reitira naba n te tai anne.

N tain te kainaomata ni karangainan te Tabati ae 11 n Ritemba ao ti bane n namakina angin te Tamnei ae Raoiroi are ti a manga bane ni kaonrakeaki iai ao riki taan kainaomataki. Aio aia tibataba tabeman i aon te bai are e riki nakoia ao a namakinna n te tai anne;

Monika - E noria aomata aika a taua te on ma ngke e kabaebae ao a bua naba. I muina ao e a manga nora tamnein te ati (heart) iaon te mataroa. E kabaebae ma e aki bae ao e tiku ana tamnei anne n ua barana.

Maria - E taonna te tang ao e namakina te ang ae okoro ae e rangi ni maiu iai. E namakina i nanona te kan kakea. E aki kona ni kabarabara raoi te bai are e namakinna ma e ataia ba e rangi ni maiu ao ni kukurei iai.

Nnakina - E namakina ae titabo ba a ewaewaraki bubuan waena n atibu aika a kakang ao e tangiria n tekateka ba e a bon rangi ni kainnanao n te maraki. Ma ngke e nang tekateka ao e namakina manena are iakuna ba e taua nukana ao titabo e butuia ni kateirakea. Ao nte tai anne e namakina te korakora ae rin inanona ao e ongo te bana ma e aki ataia ba e ongo I taningana ke mai nanona ae kangai - **Teirake tataro**, ao e kae-tia ni katorobubua ao n tabeka ana tataro. E toki te maraki ao e wanna te tang ao e namakina te korakora ao e tangiria ni kan tataro ao ni makuri ibukin kaokaia tarina ma manena ake a raroa ma Iesu

Taana - I main bakana n tong ao e namakina te kabuebue ae biririkaki mai atuna nako tabon waena. Ngkana e roko i wae-

na ao e a manga birirake te maitorotoro ao e a kakaibibiti naba, e ruo te kabuebue ao e birirake te maitorotoro. E angibuaka, akea angina ao e tanoi, ao e kataia ni kabaerantia ma e aki namakinna ba ngaia e a baka n tong ao n aki ata te bai ae riki. Ngke e a uti ao e a bon wanna te tang ao e namakina te bue ae korakora i rabatana ma ngke ti ringa ao e rangi ni maitorotoro. E namakina te raunnano ae korakora ao e tangiria n tiku riki n ti ngaia i nanon te umantabu.

Taeka n reirei

Rongorogo man ICCRS—Ana rabata te Charismatic n te aonnaba. “Iririba te ai: Kaura ao kabutanakoa uran te ai rinanon te maiu n tituaraoi”

Koreaki iroun Most Rev. Francis Kalist Rairaki iroun Nenenteiti Teariki Ruatu, Tiibi Riita. St Columan. Bikenibeu Parish.

Ane e kan rimwiu ao ke kakea n tabeka ana kaibangaki ao ke e irirai (Mataio 16: 24). Te maiu n Kiritian ma te Tamnei ae Raoiroi e boto iaon te maiu ae e mangori, n ai aron maiun Iesu. Te kuna ae neboan Kristo (...e neboaki iai Iesu ba Ngaia te Kristo are te Metia, te kabiraki, te Tia Kamaiu...) aron rongorongona are e koreaki n te Kauoua n Biribi, e kaota aron Iesu ngke e kakea rinanon maiuakinan te maiu ae e mangori ibukin kakororaon nanon Tamana (Cf Biribi. 2: 1 - 11). Ti ngkana ti irira Iesu n aron maiuna n kakeaki, ao ti na kona raoi n kaura ao n kabutanakoa uramwakan te Tamnei ae Raoiroi are ti a tia n bane n anganaki inanon te babetito. I aki toki n titirakinai bwa ibukin tera ara onimaki e teimatoa n kainnanao te maiu n kakeaki. Kanga tera ae e na rangin reke iai te ibuouoki? Iai riki te kawai nakon te kororaoi? Tera ae ti na karekea ngkana ti maiuakina te maiu n kakeaki? Ngkana e a bane aonnaba n boto iaon karikirakean te kaubwai ma te maiu ae e kakukurei, e aera ngkanne ngkai ti na uaua n kaitara aio? Te maiu n kakeaki te bwai ae e aki tamaroa bwa e uota te karawawataki ao te maraki, ma e ngaie n anne ao ti bane naba n ataia bwa koraki ake a maiuakina te maiu n kakeaki, a riki bwa raoraon te Atua, nnen te Tamnei ae Raoiroi, ao a kabonganaki naba iroun te Tamnei n te aro ae e matoatoa. Ane e kairiraki n Tamnein Kristo, ao e riki maiuna bwa katotongan Kristo.

“Ti ngkana ti irira Iesu n aron maiuna n ka-



“Ane e kan rimwiu ao ke kakea n tabeka ana kaibangaki ao ke e irirai...”



*“ao e kakawaki bwa ti
na ataia ae ‘Kauran ao
kabutanakon
uramwakan te ai
rinanon maiuakinan te
maiu n kakeaki....”*

keaki, ao ti na kona raoi n kaura ao n kabutanakoa uramwakan te Tamnei ae Raoiroi are ti a tia n bane n anganaki inanon te ba-betito”.

Te Tamnei ae e raoiroi e kariaia bwa tina nora te maiu n kababane iroun Kristo, are bon te kawai ae e nano riki ibukin katuruan tarakin ao miakinan tamaroan te Eukari ae e tabu. Inanon te Eukari ao Kristo e a tia n anganako rabwatana n aomata ao n butimwaea rabwatana ae e mangori riki n katoton te bane ao te wain (wine), bwaai aika a aki maiu, n te aro are e kataua naba buan kannatona n aomata. Ibukin kananoan ao kinakin te maiu n Kiritian aio ao ti tan nakon Tinara ae Nei Maria te Baretenia. Ibukina bwa e irira ao n toua naba te kawai are te maiu n kakeaki ngke e kariaia Tamnein te Atua bwa e na mwakuri inanona bwa e aonga n anganira te kamaiaiki ngke e butimwaea te rongorongon n kaeka ni kangai, ‘Ana tabonibai te Uea ngai, ke e karaoaki nakoiu n ai aron am Taeka’ (Luke 1: 38). Ana anganano n ongotaeka nakon nanon Tamara are i karawa ngaia ae e uota lesu nakon aonnaba – kakeana i bon irouna are e uota naba karawa nakon aon te aba. N uotakin te rongorongon nakoina iroun te anera ao e kamauria n kangai, ‘Kona mauri Maria, ae ko on n te karatia’; ibukina bwa rinanon kababaneana ao kakeana nakon ana mwakuri te Tamnei ae e Raoiroi, ao e riki ngaia bwa Tinan te Atua. Te kakeaki ae e kororaio aio iroun lesu ma Nei Maria, are a anaki naba nanoia iai taian santo ao santa n kabane are a ataia ni koaua bwa bon ti man te maiu n kakeaki ae ai aron aikai, are e na kona raoi n kainaomata ana mwakuri te Tamnei ae e Raoiroi iroun ao rinanon temanna ma temanna. Te Tama Rufus Pereira, te rita n te Kabouaki iaon Inria, ngaia temanna ae e rangin maiuakina te maiu n kakeaki. Ai aron naba Cyril John are bon temanna naba te rita ae e rangin kakamwakuri iaon Inria ao itinanikun Inria, ao are e teimatoa n kaura ao n kabutanakoa uran te ai rinanon maiuakinan te maiu n kakeaki.

N tokin te rongorongon, ao e kakawaki bwa ti na ataia ae ‘Kauran ao kabutanakon uramwakan te ai rinanon maiuakinan te maiu n kakeaki, bon tiaki te bwai ae e boou inanon ara onimaki, kiona ngkai bon ti ngaia naba te kawai nakon karekean te kororaio. E a tia n kaotaki aio iroun Tinara te Baretenia ao taian santo ao santa n kabane. Ti kona naba n karekea te kororaio

aio ngkana ti ira ao ti rinanon te maiu n kakeaki; ngkai bon ti man mwakurian ao karaoan te maiu n kakeaki are ti na kona iai n kaonrakeaki n te Tamnei ae e Raoiroi, are e na kona n biti maiura. Maiura are e kaonaki n te Tamnei ae e Raoiroi ao n kairiraki iroun te Tamnei n te aro are tina kona iai ngkanne n kaura ao n kabutanakoa uramwakan te ai rinanon te maiu n kakeaki.

Ana Tangira Te Uea

*Reitan rongorongon manangan ana tiim NSC
nako Abemama inanon Beberuare-Tuun 2016
Ioane, Teingoa, Teaoraereke Parish.*

Te Kaawa ae Binoinano, Abemana

E kan ti te arona te O-ni-Katorika aio ma te O ni Katorika are I Tewai Tabiteuea Maiaki ngke ti roko naba ikekei n 2009, ae e maekanaki irouia tamnei aika buakaka. E taekinna te Katekiti are e makuri iai ba aki rarau iai ao aomata naba ake a maeka n te maneaba aia makuri tamnei akanne. N rokon te tiim ni Kaitiaki iai ao e bon kakoaua ba a bon tira tamnei aika buakaka akanne n te tabo anne n ai aron ana noraba Katarina, ma e butia lesu ba e na anaia ni kabaeia i aan ana Kabangaki ao n aki manga kaokia nakon te O aio.

N rokora n ana Outero te Kauntira ao a taekinna te taanga ake a makuri iai ba e a bon aomata riaboron te tabo, ti maku ngkoa iai n te moan tai ao ngkai ti aki ba ti a taneiai iai. N tain te kaitiaki ao a noraki riaboro ake a tiraua i maiakin te Outero ba riaboro ake a kanakoaki man te O ni Katorika a manga bane ikai. N ana karea Katarina mairoun te Uea e butia lesu ba e na anaia ao ni kabaeia i aan ana kaibangaki ao n aki manga kaokia nako ikai. E a noria ngkanne riaboro aikai ni ngonako ni kaea taari ao ni uanako ao a tatan rikaki n taraira.

N rokon te tiim n te auti teuana ae ana auti te bureitiman ao bon iai aorakin buna ba e mamaraki waena kanga e biri ni borii n aron ana taeka neiei, ao e bon tuai marurung raoi naba ba iai naba mwina irouna n te tai aei, ao ngkana e a roko ni korakorana ao e kona ni wene i nanon irabong ao e a reke ba ai taben teuare buna ni kakauabaia nakon te roki ngkana e tangiria. N tain te kaitiaki ma te katokabai i aon te aine aei n ti ngaia ba e tei teuare raona, ao n ana karea Katarina mairoun te Uea, ao e a noria taian rabono aika rin ni waen neiei ni Kauai ao a tinetine bukia i aon rauraun waena. E buriti rabono aikai man waen te aine aei ao E an-

gan Iesu ni butia ba e na kabaei i aan ana kaibangaki ao n aki manga kaokiia nakon te aine aei ao ni butia naba ba e na kainaomata te aine aei man aia makuri tamnei aika buakaka. E raba te Uea ba e bane n anai rabono aikai mani waen te aine aei, ao e tiku ni marurung te aine aei ni karokoa bong ake ti mena iai iAbemama ni karokoa ngkai.

Kawaran te ataeinaine ae rin n te O n aoraki i bukin aorakina ae te ibea ni maraki ao e tangiria ana koraki ba e na kawaraki iroun te tiim i main kibana nako Tarawa. N rokon te tiim irouna ao e boni wene ni ngirangira ao ubuna are n te angatai i aan matana e tibutaua. N tain te katokabai ao e bon tatarua n tangitang n tain te ianena are e korakora ni karokoa e a bon toki. N tain te tibatiba ao e a kaekaki ba e aera ngke e a bon tatarua n tang n tain te nebonebo. E taekinna te aoraki ba e a koro ni makuia taimonio aika a maiti kurikuri ake a bane ni kaoti mai akun te aine arei ao e koteia. Te aine are e taekinna te aoraki bon tiaki kain te tiim ba bon kain Kariatebike, ma ngke e nora te tiim ni mananga ao e ataia ba a na kawara te aoraki ngaia are e a iri naba ba e na matakua, ma e tekeraoi te aine aei ba I a tuangia naba maneu ake a uakan ma ngaia ba a na katanna ao e bon karaoa anne maneu ae Nei lariti. E bon reitia n taekinna te aoraki ba a bane ni kionako riaboro aikai n taian kabaeae ao n rebwetuan te ianena ae korakora. E raba te Uea n ana kamaiu nakon te ataeinaine aei ba e aki roko i Tarawa ba e a marurung ao e a okira ana kawa ae Kabangaki, ao n rokona i Kabangaki n tain te taromaui n te Tabati ao bon temanna ngaia are e wareka Ana Taeka te Uea, ao e a itiaki moamoana man tararaoi. E raba te Uea ni kororaoin Ana Tangira ma Ana Kamaiu nakon te ataeinaine aei.

E tabeakina au kanganga te Uea - Mauatetaake Marewenteata Teburoburo Eita, Tiibi Riita. St Faustina. Betio Parish

N Tebetemba 2016 ao a waki ni karaoa butia kain te charismatic ni kawari auti nako iaon Banaba ao a roko naba n au auti. N tain te nebonebo ni mwengara ao e ringaki nanou n aron te tataro n nebonebo ao e taonai te tang ae bati. I aki ataia ba e kanganga n reke te namakin anne ma I ataia ba I a bon tauraoi naba n anga nanou nakoina ao I bubutia nake a roko ba I kan iria. Mai ikanne are I a irira naba aia nebonebo ni katoa Katenibong ao Tabati ao n ira reitan kabutan ana tangira Te Uea nakon mwenga n aron

are a roko naba iai iaan mwengau.

I nanon Okitoba ao I a moana au kooti n teMaiu ae Onraken te Maiu. N au kateniua ni wiki ao e tuangai kainnabau ba nna nako Tarawa ni butimaea natira are e na oki mai Biti. E a bon bane au motirawa n te ririki ao ti angan kitanakin au makuri ba nna bubuti au motirawa n aki kaboaki are kanga e bon matoatoa. N te bong are i muina ao I a manga uringa au kooti ao I uringa naba tariu are e aki bane ana kooti ngke e a mananga naba nako Tarawa ibukin aorakina. I tanrikaki ao I iangoa abakin kawaiu are I a tia n toua are bon moan te matoatoa aron keiakinan te bong teuana ma teuana ao e tang nanou ni bakataea korakorau ba I raraoma ba ngkana I baka nna manga kona ni keiaki riki ke I aki. I butia kainnabau ao ti baireia ba e a bon angabuaka manangau ngkai akea au motirawa ao iai tabeu ae I kabaeaki iai n au kooti ae I aki tangiria ba e na baka, ngaia are ti a muiokoa okin natira i nanon bain te Uea.

N au kanimaua ni wiki ao I a nako n tarebonia au aobiti (KOIL) i Tarawa ba iai te bai ae I kan kamataai iai ao a tuangai naba ba N na iangoa rokou i Tarawa imain 5/12/16 ba e na moanaki iai ara reirei ae teuana te wiki manna. Bon te wiki are imuina ao e roko te kaibuke ao e a tuangai au rita ba I a bon reita au kooti iroun ao ni kakaea angan kainaomatau ngkana I a roko i Tarawa.

I karaba te Uea n ana tangira ma ana babaire ao I kakoaua ba E bon tabeakin au kanganga ni kabane. I karimoo nanon te Uea ba I aki kan kitana au kooti ao Ngaia E kanakoraai bai ni kabane ibukiu ma kainnabau. E reke manangau ae manenaki man au aobiti, e reke butimaeaan natiu ba I roko imaina ao e reke naba au tai ni kainaomataki ao n rereua irarikia kain te kaereti-maeteki mai Betio.

I nanon au tai ni kainaomataki ni karangainan 11/12/16 ao I namakina ana tangira te Uea ae moan te bati. I namakina te ang ao te korakora ao I kakoaua ba E bon ruonai teTamnei ae Raioiroi n te tai anne. I namakina naba te rau n nano ae korakora ao I namakinna naba ae titabo I a rangi ni kaan ma Iesu. Ai aron ae e onikaki nanou ma au iango ao I onrake n te kimareirei ma te rau n nano ao titabo e a manga kabouaki au onimaki!

Ana Tangira Te Uea ni kamauan natin Nei Mari Tebina,
Teaam Ienimoo, Tiibi Riita. Teaoraereke Parish



“I karaba te Uea n ana tangira ma ana babaire ao I kakoaua ba E bon tabeakin au kanganga ni kabane. I karimoo nanon te Uea ba I aki kan kitana au kooti ao Ngaia E kanakoraai bai ni kabane ibukiu ma kainnabau.....”



*“Te utu aio e aki
tabara ma e a kaoa
naba te Karimatiki bwa
ana tataro iaona. ..”*

Aran te nati aio imain aorakina bon Nei Bootina Tebina ao imwin kamaiuana iroun ara Uea ao ara Tia Kamaiu rinanon te botaki ni Karatimatiki ao e a katonuaki arana ni babetito ae Nei Rina Tebina. Aorakin te ataei bon teibea ni maraki ni irianaki ma te maraki n atu. Korakoran aorakina aio ao akea ae kiinaa ma e ti kiinaa tinana n reitaki ma ae e aki ata naba arana n te man ae ababaki. E a bane aia bitaki taokita ni buokia aia ngaia are te ataei aio e a tangiria ni kitana te on-aoraki ao ni boutokaki naba irouia ana karo ma te kaeka irouia taokita ae akariaia.

Te utu aio e aki tabara ma e a kaoa naba te Karimatiki bwa ana tataro iaona. N tain te katoki aoraki ao ana taeka te Uea man te Baibwara bon rongorongon te manna te aomata ae onaki n te umwa-ni-kaikain ao baranakona man te onaki anne bon ti man kabatian neboakin te Uea. I nanon tain te katoka-bai ao a bati bwai aika noraki iaona n te karea ni matairiki ao a kabaekia ao a bua naba. N tian te mwakuri ao e a kamarurungaki te ataei-n-aine aio man aorakina iroun ara Uea bwa e a toki te maraki, e ata arana ao man kinaia naba kain ana utu ma raoraona. E rabwa te Uea!!!

E teretere n ana taeka te Uea bwa man kabatian neboakina ao e na maiti naba ana tangira ni kamaiu nakoiria ae na bakarira ao man katongaki naba irouia aomata ake a kainanoa ana tangira te Uea.

**Ana Tangira Te Uea ni kamauan te ro-
robuaka man kaboan rabatana.**

Taeam lenimoa, Tiibi Riita. Teoraereke Parish

E maeka te aoraki aio i Bairiki ma buna ao natina. Rongorongona bwa e riki moa i baina ao e toki. E a manga riki n te tabo te uana iaon rabatana ao e toki ao ai arona naba anne ni karokoa ae e a riki te uana iaon bukina ao ai bon te kanganga iai bwa e aki kona n tekateka ao ni irianaki ma te maraki. Maingina man te tabo te uana bon tii man tabekana irouia kain ana auti.

E a kaoaki te Karimatiki irouia kain ana auti bwa ana tataro iaona. Te Karimatiki n te tai aio e kainaki iroun te botaki n tataro mai Abaunamou, Teitonete ao kain Bairiki ni kairaki iroun loane Teingoa. N tain te katoka-bai ao te rongorongo man ana taeka te Uea man te Baibara bon rongorongon buun tibun Rewi are te kinano. A raure tanga aikai ao neiere te aine e a kitana tibun Rewi ao n okiria ana karo. Imwin te maan ae 4 te namakaina ao e a mananga te uare tibun Rewi n rimwin buna are te

kinano. E a reke te ioki ao e a taebeka manangaia te uare tibun Rewi n okiria ana karo ma ana karo neiere te aine e a tautaua manangaia ni karokoa ae e anga te kariaia imwin te tai ae maan.

Inanon te tai ni katokabai ao a rawata baika noraki aika bubuaka iaon te uaei n te karea ni matairiki ao man kabaekia ao a bua naba n te tai arei. Imwin te mwakuri ni katokabai ao e bane te kuba ma te mimi irouia te utu ma te botaki n tataro n nora te aoraki ni kokia rikaki ao n ongo ana taeka ae e karabwa te Uea n ana kamaiu nakoina bwa e a toki te maraki.

E bon maiu te Uea n ana Taeka bwa manin raureia tangan tibun Rewi ae 4 te namakaina bon manna naba ni bwaka n aoraki ae e oti n ana tibwatibwa. E taekinna naba bwa e tuangaki irouia kain ana utu bwa a nang kaoa te Karimatiki bwa ana tataro iaona ma ngaia e totokoia. E a noria bwa ai bon akea buokana man te on-aoraki ao te rabakau ni Kiribati ai ngaia are e a bitaki iai nanona ni butimaea te Karimatiki. Man te raira n nano aio ao e a reke irouna ana kamaiu te Uea. E rabwa te Uea!!!

E teretere ngkanne bwa ngaira aoraki ake ti kainanoa ana tangira te Uea ti bon riai ni kauki nanora ao n onimakina ara Uea ma nanora ae koaua bwa e mwaka iaon bwai ni kabane.

Te Maiu ae Tabu

**Katabuan Rikan Robwati Tebaiuea nakon te
Nakoa n Berebitero – 17th December 2016
n Santo Iotebwa Parish Bikenibeu
Nenenteiti Teariki Ruatu, St Columban.
Bikenibeu Parish.**

E korakora ana katauraoi te Parish ae Santo Iotebwa iaon Bikenibeu ibukin butimwaeen ao karaoan katabuan Rikan Robwati Tebaiuea n te Utu n Tama ae Mitinaren Atinibwaan Iesu (MSC) nakon te nakoa n Berebitero. E rokoroai aron ana katauraoi Bikenibeu, ibukin katauraon ana umwantabu i Nandes, ana mwaneaba ae Santa Maria (are e riki bwa nnen te baka n amwarake ae e bubura imwin taian Tutia n Katabu ao imwin naba ana moan tutia te Tama Robati), Fr. Iotebwa Itoningaina Centre are e riki bwa te tabo n katei wae irouia iruwa n kabane imwin taian tutia n aron are e a tia n maneweaki, ao n riki naba bwa aia tabo n amwarake iruwa (ana iruwa te Parish ae Bikenibeu) ake a roko tabebong imwain te katabu, ao ai bon nanon ana oo te Parish ae Bikenibeu inanon bongin te bobotaki ibukin te katabu aio.

Te tutia n katabu e waaki karaoana n ingabongin te Kaonobong ae 17th iai bongin te namwakaina ae Ritembwa 2016, are e kairaki iroun te Ebikobo Bauro Mea. Iai naba iruwa aika a kaoaki nakon te Tutita n Katabu aio ao mai buakoia bon Te Beretitenti ma buuna, te Speaker n te Mwaneaba n Maungatabu ao buuna, tabeman Minita ma buia ao ai tabeman bwakuakuan naba te Tautaeaka ake a ira ana tiim te Beretitenti n te bong ae e kakawaki aio, n raonaki irouia tabeman naba ana iruwa naba te Parish ae Bikenibeu, ake a reke rokoa n ira te tutia aio. Te mwaati n waerake nako rarikin te bao n karea ao te Eukari imoan te umwantabu e rangin kakamataku ngke a kairia taama aika e raka mwaitia iaon uangan, n raonaki irouia rikan aika uoman, akorita ao taari man te MSC ake a reke naba rokoa n ira te katabu. Mai buakoia taama aikai ao e reke naba rikon te Tama are te mataniwi n te MSC are e maeka iaon Suva, Fiji (Te Tama Tamati), are e kiba n roko nako Tarawa, Kiribati n te bong ae te 15th bongin te namwakaina ae Ritembwa ibukin naba kaeen te katabu aio.

E aki ira te mwaati n waerakean te baonikarea ma te Eukari te Rikan are e nang katabuaki bwa e tekateka mai ibuki inanon te umwantabu irarikia ana karo. Kanoan te tutia n katabu e kairaki iroun te Parish ae Bikenibeu n aron aio: Te wareboki, te taramo ao taian anene are e kairaki irouia kateki ao taan tia ibuobuoki ma buia n kabane, Te uaboki e karaoaki irouia kaain te mwakoro ae Bentekota, Te ua-karea irouia kaain te mwakoro ae Te Rooti ae Kamimi, ao te katituaraoi e karaoaki irouia kaain te mwakoro ae Nei Kaue. E rangin kakamataku, e karoko nano ao e kananokawaki te tutia n katabu aio, riki ngke e a roko te mwakoro are e a kairaki rake n waerake te Rikan irouia tamana ma tinana n nikiraki i moa inanon te umwantabu, nako matan te Ebikobo n kaeka te wewete nakon natia, ibukin te nakoa ae e tabu ae te nakoa n berebitero. A mwaiti taan ira te tutia n te tai anne bwa e kebo nanon ao tinanikun te umwantabu ao nanon te mwaneaba ae Santa Maria, e koro naba mwaitina. Ao a mwaiti naba aomata ake a ira te tutia n katabu anne ake a bane n bwaka rannimataia n ira angin te nanokawaki, te tang ao te kimwareirei are a taonaki iai ana karo te Rikan ngke a waerake n nikira natia n kaeka ana wewete te Uea nakon natia.

E bwara te tutia n katabu imwin tawanou teutana ao n taorimwiaki n te katei wae n katoki taka irouia iruwa are bon kanoan naba ana katauraoi Bikenibeu Parish n

Fr. Iotebwa Itoingaina Centre.

Te bong are imwina ao bon te Tabati ae bwakara 18th bongin Ritembwa. Aio te bong ae e kakawaki irouia kaain te Parish, ana utu ao ana iruwa te Berebitero ae e boou ae te Tama Robati Tebaiuea bwa bon ana moan tabati naba n karaoa ana moan tutia are e karaoaki n iteran tebwinan n te moan ingabong anne. E noraki kakawakin te bong aio irouia kaain St. Columban CRS, bwa a uti naba n roko n butimwaea ao n katekeraoa ana moan tutia te Tama Robati ma aia bwaintangira aika te keke are e kangai taekana: *‘Congratulations on your ordination and 1st mass Fr. Robati’*, ana kamenai ae e boou te Tama n aron ana karinano te mainaina ae e kaara ao e designed n aron aia kaborai kaain te botaki n Charismatic inanon te Parish, beena ae e uraura are e designed naba n kaineti ma katabuan te Tama ao ai te bwaoki ae e uaraoi are e onrake kanoana n aia tangira kaain te botaki. Aikai bwaai n tangira ake a uotaki nakon te Tama Robati irouia kaain te Taibora ae ao n raonaki iroun temanna kaain te NSC mai Bikenibeu Parish, ake a uoti n karokoi iroun te Tama imwain waakinan ana moan tutia, n ana auti te Tama n te Parish are e tei i tanrion te umwantabu are i Nandesi.

Fr Donald Calloway

Teburoburo Etia, Tiibi Riita, St Faustina. Betio Parish

E bungiaiki Donald Calloway n Tuun 29, 1972 i Michigan, Amerika. Ana karo bon te tautia ae e rangi ni mamananga ao angin aia tai bon ti ngaia n titiku ma tarina ae karimuina ao tinaia.

Moan te maiu buaka rikirakena ao e urui tuua aika a bati man rinanon maiu aika a aki tau. Moan te kakai un man kaitara n taai nako ao e buakaka kateina nakoia ana karo. E moana kabonganana te kamanging ma taian turaki ngke e tuai koro 14 ana ririki ao e a kaman roko n aeka n turaki nako imain ae koro 18 ana ririki! E rekereke naba ma botaki n turaki aika a bubura n aron te yakuza mai Tiaban ao e riki ba te tia nikiri turaki n tabo n takakaro (casino) i aon Honshu ao bon te bekan ae e ririba te aro ba akea irouna onimakinan te Atua. E aiwa ni baba kanga te aomata ae akea mwengana ma ti okina ae burenbai naba ngkana e a bon rotia te baki ma te kainnana. E rangi n tekeraoi irouia ana karo ba a ngae n un man maraki irouna ma a teimatoa ni butimaia ao n akoia ngkana e okiria.

E kanakoaki naba mai Tiaban – a



*“E ao n katekeraoa
ana moan tutia te Tama
Robati ma aia
bwaintangira”*



kabaeaki baina ma waena n te taurekereke ao ni kairaki irouia uoman tautia n nikiraki iroun tamana. E bati naba ana tai ni kabureaki ni karinaki n aia tabo taan turaki ma ngkana e otinako ao e a manga okira naba te turaki n te tai ae waekoa. E taku ba e ti reke te kukurei man te turaki riki ngkana ko roko raoi n angina ao e tangiria n titiku n angina anne n taai nako.

N te tairiki teuana inanon Maati 1992 ao a kubanako raoraona ngke e a karautaeka nakoia ba e a tangiria moa n tiku n rau n ana auti. E namakina te rawawata, te barannano, te bainrang ao e namakina naba ae akea bongan maiuna ao e kan bakabureia. E kataia ni kakaea te bai ae e na katabea iai ana iango ao e a ana te boki teuana man te nne ni boki ao e wareware iai. Te boki anne bon taekan kaotin Nei Maria i Medjugorje ae atuna *The Queen of Peace Visits Medjugorje*.

E aki toki ngkai ni mamananga ni kabarabara nakoia aomata ana nanonga teAtua are moan te rababa ao e tabangaki nakoia aomata nako ao n rereitia ma karakinan maiuna ba te kakoaua n ana nanoanga te Atua. E korea naba te boki are a taku ake a tia ni warekia ba moan te kakaongora ao ni katekenano are bon rongorongon maiuna mai moana n ua are e a kamaiuaki ao n riki ba te berebitero ae atuna, **No Turning Back: A Witness to Mercy.**

Te Marian Page - Nei Maria Tinan Te Atua.

Ngai kain te Muslim ao I babanga te Rotario ma e tia n anaganai natiu te aine Nei Maria - Awa Lourdes Journal of Graces, May 2016 Teburoburo Eita, St Faustina. Betio Parish.

I mamaeka i Congo n te aono n Aberika ao bon ngai kain te Muslim. Ngke I tia ni bungia natiu te mane ao I a bon aki naba manga kariki. Ruaia te ririki i muina n 2005 i nanon au tai nimotirawa i Paris ao e a manga baka naba natiu are i birotou. I muina ao e a reke au iango ba nna raun nako Rurete te tabo ae I tuai n ata rongorongona ao I kaira naba natiu are te mane.

I bukina ba ngai kain te Muslim ao I bon babanga n rotario ngaia re ngke I a roko n ana nanganga Nei Maria ao I a bon karauai n tei i matana ao n tataraiia. I a manga tekateka ao ni katurua tarakina ao iangoana ae I baretenia are I bon kakoaua naba ao I taku i nanou, "Au Uea, ko a tia ni karekea rokou n te tabo ae kakiro nako aio, ao ngkai

I a roko ikai, ao karaoa ae nanom, bon ti nanom ae e na iraki." I muina ao I a manga nako ni karoko n aia tabo n tebotebo aoraki i main ae I a manga kaea au turein n okira Paris.

Ngke I a okira Congo ao I a namakina angin te aoraki ae korakora ngaia are I a nakon au taokita are e a tuangai ba I a bikoukou! I rangi ni kimareirei n ongo te rongorongon ae kakuba man kakukurei aio. I bungia natiu te aine n Eberi 21, 2006.

N te ririki are i muina ao I a kaira natiu anne nako Rurete ba ti na anga ara karabaraba. N te tai aio ao I a tia ni Babetitoaki ao ni butimaea rabatan lesu i nanon te Eukari ae moan te tabu. I rangi ni kakaitau riki nakon ara Uea te Baretenia ni maekanakira irouna inanon mwengara.

Ko bati n raba tinara Maria.

E tuka korakoran te atom boom te Rotario - michaeljournal.org Teburoburo Eita, St Faustina. Betio Parish.

N te kauoua ni buaka n te aonnaba ao e urubeke aon Hiroshima ngke e kabakaki i aona te atom boom. A bane n uruaki auti ao ni mate aomata ma maan ake a reke inanon 1.5 te kiromita ni katobibia te tabo are e rebwe iai te boom. Te kamimi ba iai te auti teuana ae uarereke irarikin te umantabu ae ti 8 auti imarenana ma te tabo are e rebwe iai te boom ae bon akea rotakina naba teutana! Bon aia auti tama n te Jesuit ao waniman ake a maeka iai n te tai anne are a bon bane ni maiu ao ni marurung raoi n akea rotakia n te bai are e riki. Temanna mai buakoia bon te tama Hubert Schiffer are 30 ana ririki n te tai arei ao are e teimatoa ni marurung ao ni maiu 33 riki te ririki ba e a tiba mate n 1982 i Frankfurt. E anga ana maroro n tain te bowi (Eucharistic Congress) are e karaoaki i Philadelphia n teririki 1976. N te tai anne (1976) ao a bon bane naba ni maiu raona ake itiman.

A kua taan rabakau n ukera bukin aki rotakia tama aikai ma okoron aia auti ngkai e kona n tuka korakoran te atom boom ao a kunea ba bon akea okorona ma autin Tiaban n taai akanne. A tuoaki naba tama aikai irouia taan rabakau aika e raka i aon 200 maitia ao a bane n titabo aia kukune - A aki kona ni kabarabara ba a kanga ni maiu ao e kanga n aki naba rotakia auti ngkai ti te arona ma auti nako ma ti okorona ae a kunea ba e kakaraoaki te Rotario n te auti anne ni katoa bong!

"Rokon tinara i rarikira e bon uota te kukurei ae bati, ..."

